

Mid-Day Dogri News Bulletin, 24th Feb. 2025

समे — 12:25

<><><><><><>

CM Obesity Awareness

अपने कल्लै आहले मन की बात कार्यक्रम च कीते गेदे जिक्र दे मूजब, प्रधानमंत्री नरेन्द्र मोदी होरें मोटापे खलाफ लड़ाई ते तेल दी खपत घटाने बारै जागरूकता बधाने लेई जम्मू-कश्मीर दे मुख्यमंत्री ओमर अब्दुल्ला ते होरनें किश हस्तिएं गी नामजद कीता ऐ। मुख्यमंत्री होरें मोटापे करी होने आहले सेहत सरबन्धी खतरें जि'आं दिलै दिएं बमारिएं, शूगर ते मानसिक सेहत सरबन्धी मुद्दे पर लोऽ पांदे होई इस अभियान च अपने सैहयोग गी पक्का कीता ऐ। उ'नें जेहड़े 10 लोकें गी नामजद कीता ऐ उ'दे च पैरा तीरंदाज शीतल देवी, क्रिकेटर इकरा रसूल, वुशु लेई भारत दे राश्ट्री कोच कुलदीप हांडु, जम्मू-कश्मीर थमां अंतराश्ट्री रिदमिक जिमनास्ट पलक कौर, दीपिका पादुकोण ते इरफान पठान होर शामिल न। इ'नें सब्भनें गी एह गुजारिश बी कीती गई ऐ जे ओह बी अगगे 10-10 होर लोकें गी इस अभियान लेई नामजद करन।

<><><><><><>

HM Watan Ko Jaano

गृहमंत्री अमित शाह होर अज्ज नमीं दिल्ली च जम्मू कश्मीर दे युवाएं कन्नै गल्लबात करडन। युवा संपर्क तैहत "वतन को जानो" कार्यक्रम दे चलदे एह युवा गृहमंत्री हुंदे कन्नै मलाटी करै करदे न। जम्मू कश्मीर दे बक्ख-बक्ख स्कूल दे आर्थिक तौर पर कमजोर 250 बच्चें गी प्रदेश दिएं शिक्षा मंत्री सकीना इत्तू होरें 13एं दिनें दे इस दौरे लेई रवाना करोआया हा। इस दल गी दिल्ली, जयपुर ते अजमेर लेई रवाना कीता गेआ हा। समाज कल्याण विभाग ते गृह मंत्रालय दे सैहयोग कन्नै इस दौरे दा सरिस्ता कीता जा'रदा ऐ। एहदा मकसद युवाएं गी भारत दी समृद्ध सांस्कृतिक विरासत बारै जानकार बनाना ते राश्ट्री एकता दी भावना गी बल देना ऐ।

<><><><><><>

Speaker All Party Meet

औंदी 3 मार्च थमां शुरु होने आहले जम्मू-कश्मीर विधानसभा दे बजट इजलास कोला पैहले स्पीकर अब्दुल रहीम राथर होरें औंदी 27 फरवरी गी सब्भनें पार्टिएं दी इक बैठक सद्दी ऐ

तांजे सदन दे कम्मैकाजै गी बवस्थित ढंगै सिर तोढ़ चाढ़ना जकीनी बनाया जाई सकै। इस बैठका च नेशनल कांफ्रेंस, बीजेपी, पीडीपी ते पीपुल्स कांफ्रेंस दे नेता हिस्सा लैउन। 43एं दिनें दा एह बजट इजलास हंगामेदार रेही सकदा ऐ कीजे बरोधी धड़े नै केई सारे मामलें गी लेइयै सरकार गी घेरने दी तैयारी कीती दी ऐ। जित्थे इक बक्खी मुख्य बरोधी दल बीजेपी आसेआ सत्ताधारी पार्टी नेशनल कांफ्रेंस गी ओहदे चुनावी घोषणा पत्तर च कीते गेदे वादे ते शासन सरबंधी मामलें गी लेइयै घेरने दी तैयार कीती गेदी ऐ उत्थे गै पीडीपी ते पीपुल्स डेमोक्रेटिक पार्टी इक बारी फही दफा 370 दा मुद्दा पुट्टने सने शराब दी बिक्री ते खपत पर पाबंदी ते होरनें मामलें गी बी पुट्टे सकदे न।

<><><><><><>

Dy CM Delegations

उपमुख्यमंत्री सुरिंदर चौधरी होरें आम लोकें दिएं समस्याएं दे नबेड़े दे कन्नो-कन्नी विकास-बाददे आहले कम्में च तेजी आहनने दी अपनी सरकार दी वचनबद्धता गी फही पक्का कीता ऐ। उ'नें आखेआ ऐ जे सरबंधत अधिकारिएं गी एह निर्देश देई दित्ते गेदे न जे ओह लोकें दे जायज मसलें गी पैहल दी बिनाह उप्पर हल करोआन ते विकास-बाददे आहले मामलें गी बी तेजिआ कन्नै तोढ़ चाढ़न। चौधरी होर नौशैहरा, सुंदरबनी ते राजौरी थमां आए दे डेलीगेशनं कन्नै गल्लबात करै करदे हे जि'नें मुकामी मसले ते सेवाएं सरबंधी मामले उ'दे अगगे रखे। साबका विधायकें, सरपंचें ते व्यक्तिगत तौरा पर बी लोकें उपमुख्यमंत्री हुंदे'नै मलाटी कीती ते अपनियां मंगां पेश कीतीआं।

<><><><><><>

Child Labour

बाल मजदूरी पर रोक लाने दी इक महत्वपूर्ण पैहलकदमी तैहत रियासी जिला प्रशासन नै कई मैहकमे कन्नै रलियै कटड़ा च बाल मजदूरी च फंसे दे नाबालिग बच्चें गी बचाने लेई इक व्यापक अभियान रम्मेआ ऐ। बचाव टीमें हट्टियें, रेस्टोरेंटें, ढाबें, शिड़क पर लाए जाने आहली रेहड़ी-फड़ियें, कारोबारी इकाइयें च चानचक्क निरीक्षण कीता। इस दौरान 4 नाबालिगें गी बचाया गेआ। बचाए गेदे नाबालिगें गी मेडिकल जांच लेई लेता गेआ ते मगरा उन्दे रहन-सहन दी बवस्था लेई उनेंगी बाल कल्याण समिति रियासी दे सामने आंदा गेआ। बाल संरक्षण कनूनें दी खिलाफवर्जी करने आहलें खलाफ सख्त कार्रवाई दे निर्देश दित्ते गे।

<><><><><><>

Watershed Yatra Reasi

पानी दे टिकाउ प्रबंधन दी दिशा च इक महत्वै आहली गैह पुट्टदे होई संगठित वाटरशैड प्रबंधन प्रोग्राम आसेआ रियासी दिएं डिप्टी कमिशनर निधि मलिक हुंदे मार्गदर्शन तैहत जिले दे सरकारी हायर सकेँडरी स्कूल टोटे च वाटरशैड जात्तरा अभियान 2025 दा सरिस्ता कीता गेआ। इस पैहलकदमी दा मकसद पानी दी सांभ-संभाल गी बढ़ावा देना, सिंचाई सरबंधी सरिस्तें च बाददा करना ते प्रधानमंत्री कृषि सिंचाई योजना दे दुए चरण दी अमल-आवरी जकीनी बनाना ऐ। इस मौके उपपर जागरूकता कार्यक्रमें सने, रूख-बूहटे लाने सरबंधी अभियान ते गल्लबात आहले गेड़ बी लोआए गे।

<><><><><><>

Announcement

आकाशवाणी जम्मू दे क्षेत्रीय समाचार एकांश आसेआ कठुआ जिले लेई अंशकालिक संवाददाता यानि पीटीसी लेई दरखास्तां मंगियां गेइयां न। इच्छुक आवेदक जेहदी उमर 24 थमां 50 बरें दे बश्कार ऐ ते ओह कठुआ जिले दा रौहने आहला ऐ, इस लेई आवेदन करी सकदा ऐ। मेदवार कश पत्रकारिता च पी.जी डिप्लोमा, डिग्री या कुसै बी पंजीकृत यूनिवर्सिटी थवां ग्रैजुएशन ते पत्रकारिता च 2 बरें दा तजुर्बा होना लोड़चदा ऐ। मेदवार गी कम्प्यूटर पर खबर बनाने ते मीडिया कवरेज दे अनुभव सने सरबंधत लोड़चदे उपकरणें वगैरा दा इस्तेमाल करना बी औना चाईदा। आवेदक जिला सदर दफ्तर दी 10 किलोमीटर दी हद्द दे अंदर-अंदर रौहदा होना चाईदा ऐ। दरखास्त ते लोड़चदे दस्तावेजें दी कॉपी मेदवार गी क्षेत्रीय समाचार एकांश आकाशवाणी पंजतीर्थी जम्मू पिन कोड 180001 उपपर 07 मार्च 2025 थवां पैहले-पैहले आइए दस्ती जमा करोआनी होग। इस बारै व्यापक जानकारी आकाशवाणी दी वेबसाइट www.newsonair.gov.in पर उपलब्ध ऐ।

<><><><><><>